

道路、真理、活命

真理就是歡喜為著眾人 ê 人權，來犧牲性命。

高俊明／台灣基督長老教會前總幹事

紀錄整理：林碧堂／台南神學院神學研究所學生



母語葡萄園有聲版，請上網收聽。
新使者雜誌：<http://newsgr.pct.org.tw/>

高俊明牧師 2012 年 tī 台南神學院世界人權日紀念演講會所講：
逐家同學、兄弟姊妹，逐家平安（平安）。我今 á 日有按呢 ê 機會，我感覺真要緊，我今 á 日所欲講--ê，毋是欲講新而獨立 ê 國家。我今 á 日所欲講--ê，就是「耶穌是真理、道路、活命」。這三項最近 tī 我 ê 心內，有真大 ê 感動。頭一項，耶穌是道路，耶穌 ê 偉人觀真要緊，這 kap 台灣 ê 偉人觀拄好倒 péng。今 á 日台灣 ê 偉人觀，是講家己 ē-tàng 讀較濟 ê 冊、趁較濟錢、坐 tī 地位較 koân ê 位，這款人就是 gâu ê 人。但是主耶穌伊 ê 看法，kap 這倒 péng。主耶穌伊 ē-tàng 用天軍天兵來推翻羅馬帝國 ê 軍隊，當時 ê 人民也是真 òng 望主耶穌成做國王，來拯救--in，來建立一個新而獨立 ê 國家。總--是主耶穌伊感覺，按呢無的確是 tiòh，伊講一句真要緊，就是恁中間嗰人欲做大--ê，著愛做眾人 ê 奴僕，來服務眾人，甚至犧牲家己 ê 性命。主耶穌伊 m̄-nā 是按呢講講--ê nā-tiāⁿ，伊家己本身就是按呢做。所以今 á 日，咱欲救台灣成做新而獨立 ê 國家，咱的確愛親像要主耶穌這款偉人觀，歡喜為著眾人 ê 幸福來犧牲性命，歡喜為著眾人 ê 得救、進入上帝國，來犧牲家己 ê 性命。

過去，八十幾年 ê 日子，生活 ê 中間，我深深意愛約翰福音 13 章第 33 節，在 hia（16 章）也按呢講，講世間恁有苦難，獨獨恁著愛勇敢壯膽，tī 世間恁有苦難；獨獨恁 thang 放心；我已經 khah 贏世間。主耶穌閣講，我就是道路、真理、活命。這個道路，是欲予人踏--ê，道路毋是欲 khàm tī 別人 ê 頂面，tī hia thún 踏別人、指揮別人、iah 是得著社會



koân ê 地位，tī hia 得著家己 ê 利益。我最近一直 teh 分，啥物是政客，啥物是政治家。我是感覺，政客就是事事為著家己 ê 利益、家己 ê 地位來爭權奪利，這款人是政客。但是政治家，就是親像林肯，親像主耶穌這般樣，歡喜家己犧牲性命，犧牲家己所有一切，來為著眾人，圖謀眾人 ê 人權，眾人成做上帝國 ê 國民。所以，這個偉人觀，是我所 teh 講--ê，最要緊，主耶穌 ê 偉人觀，就是歡喜成做眾人 ê 奴僕，來服務眾人，來造福眾人，來保障眾人 ê 人權。主耶穌有 tī chia 講起，就是道路、真理。這個真理很要緊，咱 teh 在研究真理是啥物，這真困難。但是主耶穌 ê 人生，咱知，真理就是包含兩項代誌，頭一項就是正義、公平、公正。第二項，真理就是歡喜為著眾人 ê 人權，來犧牲性命。所以，這是我感覺非常要緊--ê。

戴仁壽 kap 樂山園

Tī 《熱愛台灣行義路》內面，我有舉真濟例，原住民 ê 初代基督徒，是咱對外國得--著 ê chia-ê 宣教師（去傳福音），in chia-ê 人實在是真偉大，in ê 偉人觀，就是歡喜為著眾人犧牲性命，無 teh 爭權奪利，家己有真大 ê 才能、欲得著家己 ê 財產，ē-sái；但是 in 無愛。In 歡喜為著眾人來犧牲，tiāⁿ-tiāⁿ 就是為著當時受人看輕 ê 人來犧牲，親像這個戴仁壽長老，戴仁壽博士，伊是一個醫學博士，也是一位做過醫學院院長 ê 人。但是，伊 tī 當時 ê 社會，發現真濟 thái-ko（癲瘋）病人，所以伊為著 in ê 人權，戴仁壽長老，去八里坌買山坡地二、三十甲，結果就受人誤解，

人 kā 伊趕，講 bé-sái tī chia 起這款病院，總--是 chia-ê 艱苦，伊也甘願承擔，後--來伊開始樂山療養院。Tī hia，伊用聖詩治療，用上帝 ê 話治療，用勞動治療等等，來幫助 chia-ê 患者，當時是受人看輕、排斥 ê thái-ko 病患者，因為這個戴仁壽長老按呢 ê 疼心，伊歡喜成做眾人 ê 道路、欲到 tī 主耶穌 ê 道路，所以 tī hia 犧牲真大。但是結果啥 mih 款？結果因為醫生、護士 ê 努力，發現有一款藥仔 ē-sái 予 thái-ko 病完全受醫治，予 in ē-sái 恢復社會生活，這就是我 teh 講--ê，主耶穌 kap 咱 saⁿ-kap tī--teh，予咱主耶穌變成道路，m̄ 是欲踏別人，m̄ 是欲家己 ê 幸福建立 tī 別人頂面，是家己予人 thún 踏、受苦，來成做主耶穌所歡喜 ê 道路。這個戴仁壽長老 ê 疼心，就成做今 á 日 ê 樂山療養院（樂山園），樂山療養院現在已經無 teh 收容 thái-ko 病人，但是現此時有收容濟濟殘障 ê 囡仔，予 chia-ê 囡仔 ē-tàng 過有意義 ê 生活，予 chia-ê 囡仔 ê 家族，ē-tàng 因為樂山療養院 ê 事工，得著真大 ê 幫助。所以，咱講，台灣成做新而獨立 ê 國家，的確愛倚靠主耶穌這款 ê 偉人 ê 精神，來犧牲家己，成做道路，予人 thún 踏。若按呢，上帝的確會祝福--咱，予咱 ē-tàng 親像戴仁壽創設 thái-ko 病院，chit-máē-sái 照顧殘障 ê 囡仔，這實在是偉大 ê 代誌。咱欲予台灣成做新而獨立 ê 國家，的確愛倚靠主耶穌，成做道路，是主耶穌所歡喜 ê 道路，受人 thún 踏，踏 tī 咱頂面，來行向前，的確 ē-tàng 成做上帝所歡喜 ê 囡兒。今 á 日，我是感覺，咱 teh 講新而獨立 ê 國家 ê 時，真強調人權 ê 問題，這真要緊。我真感謝李勝雄律師足強調這點，



高俊明牧師 ê 分享：這個道路，是欲予人踏-ê，道路毋是欲 khàm tī 別人 ê 頂面，tī hia thún 踏別人、指揮別人、iah 是得著社會 koán ê 地位，tī hia 得著家己 ê 利益。（王昭文 攝影）

有寡人聽著這點，攏想講這是政治、m 是人權 ê 問題，事實上是，這也是咱信仰 ê 問題，咱勇敢傳福音，叫人信主耶穌是真理、是活路，若是按呢，主耶穌欲予咱所做 ê 代誌，變做活路，成做活命，欲來造福真濟人。

瑪喜樂疼小兒麻痺 ê 小朋友

差不多四十年前，一位小姐，叫做喜樂小姐（Joyce McMillan），伊 tī 美國 ê 時，聽著謝緯牧師 ê 講道，真受感動，伊講謝緯醫

師真認真 teh 做台灣小兒麻痺、烏腳病人（ê 治療），但是猶是感覺二林這個所在，猶有真濟小兒麻痺 ê 人。四十年前，這個喜樂小姐 ê 老母破病、先生過往 ê 時，伊就賣掉財產，來到台灣二林 ê 所在，建設喜樂保育院。頭起先，伊收 ê 小朋友是十幾個 nā-tiān、小兒麻痺 ê 小朋友，但是伊歡喜成做眾人 ê 道路，倚靠主耶穌一步一步來行。這個喜樂小姐，tī 四十年前收十幾個小兒麻痺 ê 小朋友，但是今 á 日，已經變做四百外個，對小朋友

到九十歲 ê 老人 ê 保育院，tī chia 照顧濟濟殘障 ê 人，也予 chia-ê 殘障 ê 人 ê 家庭，得著真大 ê 福氣。偉大 ê 國家，咱講新而獨立 ê 國家，就是真善美，充滿信望愛 ê 國家，這個國家，就是一個人閣一個人，用信仰歡喜 tòe 主 ê 腳步，來成做道路，真理 ê 道路。正義、仁愛是啥物？咱 tī chia 強烈主張，做真理 ê 道路，若是按呢，咱會受著上帝祝福，親像這個喜樂阿媽，對十幾個小兒麻痺 ê 小朋友，一直發展，puh-iⁿ、成長，成做四百外個青少年、iah 是老人，tī hia 生活 ê 所在，所以這個，就是咱今 á 日所欲努力來行--ê。換一句話講，偉大 ê 國家，就是有偉大國民 ê 國家，有偉大國民 ê 國家，就是有真正偉人觀，歡喜 tòe 主耶穌 ê 腳步，來成做眾人欲行到主耶穌這款 ê 道路 ê 道路，若是按呢，主耶穌會予這個路，成做 puh-iⁿ、成長，利益濟濟人。

繼續關心人權

最近，我有讀著自由時報 m̄ 知幾年前，國立政治大學有做一個調查，調查台灣十八歲以上 ê 人，對台灣未來 ê 前途有啥款 ê òng 望，假設中國予咱自由投票，十八歲以上 ê 年輕人投講，假設中國無反對，咱歡喜支持台灣成做新而獨立 ê 國家。我讀了真受感動。後--來 in 閣改問，假設中國反對，按呢恁按怎想。Tī hia，有百分之五十四 ê 人，投講，咱猶原主張，台灣成做新而獨立 ê 國家。M̄ 是共產國家，m̄ 是獨裁國家，是逐家認真來行 tī 真理，來造福眾人，按呢 ê 國家。我想講，連中共反對台灣獨立，chia-ê 人有百分之五十四，猶原是主張台灣愛成做新而獨立 ê

國家，chia-ê 人，也有受著咱到教會、仝款理念 ê 人 ê 影響，若是四十年前，會連這一半都無。但是今 á 日有 chiah-nī 濟人，愛台灣成做新而獨立 ê 國家，我想，有教會、社會逐家 ê 努力，台灣 chia-ê 受苦 ê 人，漸漸受著逐家 ê 照顧，變做台灣就是眾人歡喜相疼，真理 kap 正義互相擁立 ê 一個所在，這是非常好 ê 代誌。

咱今 á 日，m̄-nā 是對人權宣言 teh 努力，這是真要緊、真基本，但是主耶穌 kap 咱同在，咱用真正 ê 偉人觀來成做道路，來跟 tòe 主耶穌，來 chia、hia，來照顧殘障 ê 人，若是按呢，咱的確 ē-tàng 成做新而獨立 ê 國家。我感覺，這個代誌若逐家知影，這個新而獨立 ê 國家，就是多樣性，咱 tī chia 看著社會有啥 mih 無公平 ê 所在，咱歡喜 tī hia 用有效 ê 方法，來成做主耶穌所歡喜 ê 道路。可比講，最近我發現著有一位李牧師（李政隆），伊是貴格會，貴格會對美國有真大 ê 貢獻，貴格會 ê 這位李牧師，伊看著台灣有 chiah-nī 濟街友，in 無物件 thang 食、破病無所在 thang 去，伊就下決心，tī 台灣幾若個所在設恩友中心，無叫 in 街友，是因為 tī 耶穌基督內面，成做恩典 ê 朋友，tiāⁿ-tiāⁿ 供應--in，一日兩頓 iah 三頓。有 ê 人無健保卡，就發恩友健保卡予--in，予 in ē-tàng tī 台灣一百二十幾個診所看病，受治療。我感覺，按呢 ê 工作，是非常要緊，也是咱記念台灣人權宣言非常重要 ê 所在。親像這款非常重要 ê 工作，若是 ē-tàng 有閣較濟人關心、支持，按呢，台灣的確會變做上帝所歡喜、新而獨立 ê 國家。感謝逐家。🙏